

Dörfligeischer 1982

Wüsst dir worum mir hei so gruusig gälbi Gringe,
Ranzeweh und nur mit grosser Müeh chöi singe ?
Es git e Grund, und dä dörft dir gar nie vergässe:
Mir hei drum Néstlé-Überlebensnähig gässe !

Uf Freiärs Füesse mache mir üs jetz uf d' Socke,
Nümm pär Rolls Royce wei mir üsi Meitli locke,
Viu schnäuer chunnsch de hütt derzue es Meitli z' liebe
Spienzlich ds nöie Abi vo de Verchersbetriebe !

Das Gschüiss im Fernseh wüu der Charles hett unterschriebe
Nur no d' Lady Di, si Angetrauti z' liebe,
Jetzt wird dä Rummel no viu grösser, s'isch zum lache,
Nur wüu die zwöi, wie angeri ou, es Gööfli mache !

Chuum isch der Kohler gwählt, tuet är si Diensch quittiäre,
Das isch Taktik, wird e jede gly kapiäre,
So möcht der Freisinn, ohni euch a d' Urne z' hetze,
Das aute Schlachtross dür 'ne junge Goul ersetze !

Jetzt hei mer ändlech üsi Gleichberächtigung,
Die bringt de vieli Ehe wieder nöi in Schwung,
Jetzt chöi de nämlech d' Froue, o die arme Täsche,
Am Sunntig wieder alles Gschirr elei abwäsche !

Die Gschalt, wo dir do gseht mit halbverrissne Hose,
Mit kaputtem Hemli und paar blaue Mose,
Das isch kei Randalierer, müesst nid z'wyt go sueche,
Dä hett nur ds Loeb-lech Gratis-Kino wöue bsueche !

D' BSG und d' BTI tüe fusioniäre,
Ihr Lüt, mir Geischer choi dä Schritt nid rächt kapiäre,
Wär gloubt de ou, es chönn am Seeland öppis nütze,
E Rassehund mit em ne chranke Baschter z' chrütze !

Was gäh sech die dräckige Gluntschi am Fernseh für gruusigi Muntschi,
U schmuuse u chafle u hudle das stinkige Sennetuntschi,
Für dass er sech nid mit dene im glyche Dräck muess wälze,
Chunnt der Fernseh-Pfarrer Sieber jetz uf Stälze !

Zersch tüe si zwee Liter Fuessschweiss mit Urin vermische,
Füege no Eiter zue, und lö's ufem Fүүr lo zische,
De presse si no zwöi Kilo Chnollebletter-Pilz drii,
Die fertigi Brüehi söu de spanisch's Olivenöl si !

Im ne Nacht-Club hocke u zäh Whisky schlürfe,
Im Casino vo Las Vegas Gäld verwürfle,
Sünnele, bädele, blüttle, schöni Meitli verfuehre,
So tuet der EHC im Summer jetz träniäre !

